



PARLAMENT DE CATALUNYA

Resolució 479/X deth Parlament de Catalonha, pera quau s'acòrde de presentar ara Mèsa deth Congrès des Deputats era Proposicion de lei organica de delegacion ara Generalitat de Catalonha dera competència entà autorizar, convocar e celebrar un referendum sus eth futur politic de Catalonha

Plen deth Parlament

Eth Plen deth Parlament, ena session tenguda eth 16 de gèr de 2014, a acordat de tramitar dirèctaments e en lectura unica era Proposicion entà presentar ara Mèsa deth Congrès des Deputats era Proposicion de lei organica de delegacion ara Generalitat de Catalonha dera competència entà autorizar, convocar e celebrar un referendum sus eth futur politic de Catalonha.

Fin finau, d'acòrd damb er article 154.1 e es concordants deth Reglament deth Parlament, er article 87.2 dera Constitucion espanyòla e er article 61.b der Estatut d'autonomia, a adoptat era següenta

RESOLUCION 479/X DETH PARLAMENT DE CATALONHA, PERA QUAU S'ACÒRDE DE PRESENTAR ARA MÈSA DETH CONGRÈS DES DEPUTATS ERA PROPOSICION DE LEI ORGANICA DE DELEGACION ARA GENERALITAT DE CATALONHA DERA COMPETÈNCIA ENTÀ AUTORIZAR, CONVOCAR E CELEBRAR UN REFERENDUM SUS ETH FUTUR POLITIC DE CATALONHA

Preambul

I. Eth pòble de Catalonha, ath long dera sua istòria, a manifestat era voluntat d'autogovernar-se damb er objectiu de potenciar eth progrès, eth benestar e era igualtat d'oportunitats des ciutadans e de refortilhar era pròpria cultura e era identitat collectiva.

Aquesta voluntat s'a exprimit en actuau periòde democratic cossent damb er encastre constitucionau e estatutari, qu'a permetut era recuperacion des institucions d'autogovèrn e d'un important espaci d'autonomia politica e administrativa.

Es darrèri ans era majoria de fòrces politiquas e sociaus catalanas a impulsat mesures de transformacion prigonda der encastre politic e juridic de Catalonha, era mès importanta que siguec era reforma der Estatut impulsada peth Parlament en an 2005. Mès aquest procès non reüsic pr'amor des dificultats metudes des des institucions estataus e, fòrça especiauments, a causa dera Sentència 31/2010 deth Tribunau Constitucionau, que barrèc eth pas ara evolucion der encastre politic e juridic de Catalonha enes tèrmes qu'establís er



PARLAMENT DE CATALUNYA

Estatut deth 2006, aprovat pes Corts Generaus e referendat peth pòble de Catalonha.

Es manifestacions massives deth 10 de junhsèga de 2010, der 11 de seteme de 2012 e der 11 de seteme de 2013 sigueren ua expression clara deth refusament de Catalonha ara menstenguda des decisions des sues institucions e des sòns ciutadans e dauriren ua naua dimension des aspiracions nacionaus.

Eth 27 de seteme de 2012, eth Parlament de Catalonha, mejançant era Resolucion 742/IX, constatèc eth besonh qu'eth pòble de Catalonha podesse determinar liuraments e democraticaments eth sòn futur collectiu per mejan d'ua consulta. Es darrères eleccions en Parlament de Catalonha, celebrades eth 25 de noveme de 2012, confirmèren aguesta voluntat de manèra clara e indobtabla mejançant era configuracion d'ua majoria parlamentària favorable ar exercici deth dret de decidir, qu'includie enes sòns programes electoraus, coma objectiu prioritari, era convocatòria dera consulta.

Atau madeish, eth 13 de març de 2013 s'aprovèc era Resolucion 17/X deth Parlament de Catalonha, sus er inici d'un dialòg damb eth Govèrn der Estat entà hèr possibla era celebracion d'ua consulta sus eth futur de Catalonha.

II. Era Constitucion e er Estatut consacren eth principi democratic coma ua des valors essenciaus der encastre politic e juridic. Aguest principi democratic s'articule essenciauments mejançant era democràcia representativa, mès tanben mejançant era participacion politica dirècta des ciutadans enes ahèrs publics, cossent damb es articles 23.1 dera Constitucion espanyòla e 29.1 der Estatut d'autonomia de Catalonha. Aguesta participacion dirècta a coma estrument basic eth referendum, que permet demanar as ciutadans era sua opinion sus decisions politiquas de transcendéncia especiau, per miei der exercici deth dret de vòt e d'un procès e ues garanties de natura electorau.

Es darrèri ans s'a configurat en Catalonha ua voluntat clara e indobtabla des ciutadans, es fòrces politiquas majoritàries e es institucions dera Generalitat de celebrar ua consulta sus eth futur politic de Catalonha.

Era convocatòria d'ua consulta s'a de considerar un scenari normau e pleaments omologable as païsi damb tradicion e natura democraticas, coma ei eth cas deth Canadà o era Grana Bretanha, que, deuant demandes formulades per ua comunitat nacionau restacada a un territòri claraments delimitat politicaments e administrativaments (eth Quebec e Escòcia, respectivaments), considèren qu'era melhor forma d'expression d'aguesta voluntat collectiva ei ua consulta referendària. Eth Conselh d'Euròpa tanben considèrè eth referendum coma eth mecanisme mès idonèu e democratic entà conéisher era voluntat des ciutadans en ahèrs d'aguesta natura.

Cau arrebrebar, en aguest sens, era condicion de nacionalitat de Catalonha en vertut der article 2 dera Constitucion e der article 1 der Estatut, de nacion en



PARLAMENT DE CATALUNYA

vertut deth preambul der Estatut e de pòble segons eth preambul dera Constitucion.

Fin finau, tanben cau auer present qu'er article 2.4 der Estatut establís que «es poders dera Generalitat emanen deth pòble de Catalonha».

III. Era convocatòria e celebracion d'un referendum sus eth futur politic de Catalonha pòt auer assemblatge ena Constitucion, ena mesura qu'aguesta non excludís era possibilitat d'un referendum consultatiu en encastre d'ua comunitat autonòma ne establís limits en çò que tanh ath sòn contengut.

Era expression deth dret de decidir per miei d'un referendum consultatiu non se pòt considerar tanpòc, en era madeisha, incompatibla damb er encastre constitucional e legau. Era natura consultativa deth referendum a de perméter d'aplicar-lo en cas concrèt deth dret de decidir, en tot comprèner qu'ei era formula mès idonèa entà iniciar un procès democratic e non pas entà definir en eth madeish ua realitat juridica que depenerà dera negociacion politica posteriora e dera aplicacion des resultats deth referendum d'acòrd damb eth principi de legalitat e sense excludir, naturauments, es procèssi de reforma constitucional.

IV. Er article 149.1.32 dera Constitucion resèrve ar Estat era autorizacion dera convocatòria de consultes populares per via de referendum. Atau ac establís tanben era Lei organica 2/1980, deth 18 de gèr, sus era regulacion des diferents modalitats de referendum, que desplegue eth dit article. Totun, er article 150.2 dera Constitucion permet ar Estat de transferir o delegar as comunitats autonòmes, per miei d'ua lei organica, facultats corresponentes a ua matèria de titularitat estatau que pera sua natura siguen susceptibles de transferència o delegacion.

Era autorizacion dera convocatòria de referendums se configure tecnicaments coma ua competència estatau, cossent damb er article 149.1.32 dera Constitucion, e, donques, coma ua facultat transferibla o delegabla en tot prèner coma base er article 150.2 dera Constitucion. Ath delà, en tot tractar-se d'un referendum consultatiu e d'encastre territorial autonòmic, non mos trobam damb un cas en qué era natura dera matèria hèsque inaplicable er article 150.2 dera Constitucion. Aguesta conclusion se refortilhe damb eth marge d'apreciacion politica que permet aquest precèpte e pòt depèner tanben dera forma, era artenhuda e es condicions en qué s'articule era cession der exercici dera competència estatau.

Era lei organica complís tanben en aquest cas era exigència de reng normatiu qu'a establít era jurisprudència constitucional en matèria de referendums, reng que permet d'arreconéisher un referendum consultatiu d'encastre autonòmic. Es facultats estaus en matèria de referendums, que resulten dera connexion entre es articles 23, 81, 92.3 e 149.1.32 dera Constitucion, as quaus hè referència eth fondament juridic 69 dera Sentència 31/2010 deth Tribunal



PARLAMENT DE CATALUNYA

Constitucionau, permeten ath legislador organic estatau, coma ja s'a dit, d'establir e regular modalitats referendàries desparières des establides pera Constitucion, qu'ua d'encastre autonomic.

V. Era experiéncia de d'auti païsi democratics enes quaus s'an prepausat o se prepausen procèssi similars ath catalan met en relèu era complexitat qu'aguesti presenten, sustot per çò qu'ei des exigéncias deth principi democratic e de legalitat.

Eth principi democratic, en quau se fondamente eth sistèma politic der Estat, a de perméter que se pogue exprimir era voluntat deth pòble de Catalonha en un moment en qué sociauments e institucionauments se produsís ua demanda majoritària e indobtabla en aguest sens, demanda qu'a coma subjècte politic de referéncia un pòble qu'a era condicion innegabla de comunitat nacionau. Aguesta voluntat sus eth futur politic collectius'a de poder exprimir entà constatar-ne era vertadèra artenhuda e açò s'a de poder hèr damb un referendum que somete de manèra clara e precisa aguest ahèr.

Tot açò a condicion qu'un resultat favorable en referendum a d'auer coma conseqüéncia, per exigéncia deth madeish principi democratic, qu'era voluntat exprimida enes urnes obligue a un determinat capteniment politic der Estat e dera Generalitat, a saber, eth de negociar de manèra leiau e sense retards eth procès a seguir entà convertir en realitat juridica aquera voluntat.

Per aguesta arrason, aguesta lei òpte pera formula dera delegacion *ad casum*, entà facilitar era aplicacion der article 150.2 dera Constitucion e establir ath madeish temps un encastre de besonh de coordinacion e collaboracion entre er Estat e era Generalitat que permite d'assumir un engatjament d'accion en foncion deth resultat deth referendum.

VI. Era iniciativa qu'impulse aguesta lei partís dera constatacion qu'era situacion politica e sociau en Catalonha a experimentat aguesti darrèri tempsi, sustot dempús dera senténcia que requeigues sus er Estatut, cambiaments substanciaus en çò que hè ara transformacion der encastre politic o juridic en vigor.

Aguesta demanda tan evident a de poder auer ua via juridica d'expression en un Estat qu'assumís era democràcia coma ua des sues valors essenciaus e ei membre dera Union Europèa, qu'a tanben coma valor constitutiva eth principi democratic.

Eth Parlament de Catalonha a exprimit en diuèrses escadences era voluntat qu'eth dret de decidir se pogue hèr efectiu per miei d'ua consulta as ciutadans de Catalonha sus eth sòn futur politic collectiu. Tanben eth president e eth Govèrn dera Generalitat s'an prononciat de manèra clara en aguest sens e an demanat



PARLAMENT DE CATALUNYA

ar Estat qu'adòpte es mesures de besonh entà qu'aguesta consulta sigue juridicaments possible.

Vist qu'enquia ara non i a agut cap arrespona politica ad aquesta demanda, era presenta iniciativa, que s'exercís en tot basar-se en article 87.2 dera Constitucion e en article 61.b der Estatut, a er objectiu de perméter de hèr era consulta per miei d'un referendum, coma forma mès idonèa de consulta entad aquest cas, e d'un procediment qu'a de perméter de hèr-la d'acòrd damb es paramètres qu'es procèssi comparadi mès semblables ath de Catalonha assoliden coma praxi adequada e assumida en encastre internacionau.

Damb aquesta iniciativa, eth Parlament de Catalonha vò impulsar era aplicacion d'ua via constitucional e legitima entà poder hèr eth referendum que demane era màger part de ciutadans de Catalonha e ac hè dera manèra qu'enten mès adequada e en tot ponderar toti es interèssi que se ven afectadi per un procès d'aquesta natura.

ARTICLE UNIC. DELEGACION ARA GENERALITAT DE CATALONHA DERA COMPETÈNCIA ENTÀ AUTORIZAR, CONVOCAR E CELEBRAR UN REFERENDUM SUS ETH FUTUR POLITIC DE CATALONHA

1. Se delègue ara Generalitat de Catalonha era competència entà autorizar, convocar e celebrar un referendum consultatiu entà qu'es catalans se pronóncien sus eth futur politic collectiu de Catalonha, enes tèrmes que s'acòrden damb eth Govèrn der Estat e damb es condicions qu'establissen es apartats 2, 3 e 4.
2. Eth referendum s'a de convocar e celebrar abans que finalize er an 2014, e non pòt coïncidir damb periòdes electoraus ne damb ua data de naut contengut simbolicopolitic.
3. Era convocatòria deth referendum l'a de hèr eth Govèrn dera Generalitat.
4. Eth procediment entà hèr eth referendum e es sues garanties son es que determinen era legislacion des procèssi referendaris e electoraus e, s'ac cau, eth decret deth Govèrn dera Generalitat que convòque eth referendum.

Palai deth Parlament, 16 de gèr de 2014

Eth secretari tresau

Era presidenta deth Parlament

Josep Rull i Andreu

Núria de Gispert i Català